

海陽縣志卷三十五

列傳四

趙德唐

林從周

許申

黃程

林巽

盧侗

陳希伋

劉允

張夔子昌裔

王大寶

林昌期

盧順之

張雷

姚宏中

胡斌

馬發

海陽縣志

卷三十五

列傳四

一

陳植已上宋

陳肅孫元龍曾孫善

戴希文

張奐

陳德安

李關已上元

唐

趙德大曆十三年戊午進士元和閒韓愈刺潮牒置鄉校稱德沈雅專靜頗通經有文章能知先王之道論說且排異端宗孔氏可以為師延攝海陽尉為衙推官句當州學事及愈改袁州欲攜與俱謝弗往愈高其操賦詩為別有婆娑海水南簸弄明月珠之句又以平生所作文授之德讀而序之曰文錄序見藝文略學者稱為天水先生後世思其德祀鄉賢並配享韓廟據阮志周志參修

宋

林從周景德二年進士授南安主簿郡以符召爲椽從周日在刺史前侃侃持論爲主計者所器使涖劍州銀冶歲入逾常以最擢大理評事筦權永嘉遷本寺丞知考城縣有惠政王欽若出刺杭奏辟爲副授太常博士通判軍州事伉直不阿尋入爲屯田員外郎充開封府推官以獄空歲稔獻賦頌一寓規誠上亦降手詔褒之民有殺其兄之二子以攘財者長死幼走免事發獄成以母老議留養從周曰使無狀子居母側以凌其幼孤必無全理且縱奸不可孤雖幼足侍養卒配海外轉度支員外郎提點浙江東西刑獄仁宗初郊從周以府僚侍祠例蔭一子出身念其弟從善早卒

海陽縣志

卷三十五

列傳四

一一

奏以予其子其後子弟食祿於朝者至二十餘人

據張志周志
粵大記參修

許申字雍之少以文受知於陳堯佐祥符三年舉賢良會眞宗東

封獻賦頌召試擢第一

時召試
三百人

授秘書省校書出知鄞縣遷知韶

州移吉柳建三州歷廣西提點刑獄改轉運使兼制江西湖南諸路皆有治聲神宗時極言新法之弊忤宰執坐貶終刑部郎中著

有高陽集行世

據周
志修

謹案許申周志作潮陽人張志不載而詳其冢墓攷許氏族

譜申父乾德於周恭帝時由南詔遷潮陽韓山潮州自唐稱

潮陽韓山邑城東山也周志作潮陽人誤今采其傳補入

黃程少結廬讀書西湖山陳堯佐刺潮程與許申林從周皆爲所

獎引堯佐自潮召還攜程偕行欲畀以恩澤通籍毅然不受以遜

同舍生從周後登天聖五年進士第官至太子中舍

據阮志修

林巽字巽之天聖中應材識兼茂明於體用科對策鯁切有忤權

貴有司不敢取慶厯中投匭論事仁宗鑒而異之官以徐州儀曹

巽不屑就毅然南歸讀易著卦元卦經卦緯叢詞起律吹管範餘

敘和八篇總名之曰易範嘗曰世不吾知後五百年當有演繹吾

書者人稱爲草範先生外有文集若干卷

據輿地紀勝阮志張志參修

盧侗字元伯行實樸茂事親至孝爲鄉里推重甘旨暇手不釋卷

嘗結廬讀書西湖山博習經術尤邃於易自爲訓釋曰與諸生相

討論五應鄉薦皇祐五年以恩釋褐授本州長史嘉祐中余靖蔡

海陽縣志

卷三十五

列傳四

二二

襄王舉元皆薦侗文行調歸善簿未幾靖帥廣州以機宜辟治平

初諸司剡章交薦蔡杭以廣漕召還國子監亦復以經學薦之召

對授國子監直講熙甯初力言新法不便遂求外補知柳循二州

以太子中舍致仕立祭田大潭塘以祀先人卒於家

據阮志修

陳希伋字思仲元豐閒入太學肄業十餘年人稱廣南夫子上書

數萬言切中時弊元祐八年舉經明行修應詔擢第一命典梅州

時朝廷下諸州採珠希伋力爲奏免嗣卒於官著有揭陽集

據周志修

謹案希伋周志作揭陽人攷希伋登元祐進士揭陽至宣和

三年始由海陽析置故邑鼎甲坊列希伋名今采其傳補入

劉允字厚中胸臆夷曠博極羣書甫冠四薦禮闈登紹聖四年進

士任循州戶曹釐剔宿弊時州守重疲其兵兵譁允諭解之改知程鄉歲旱州督租如故允力爭之會使者廉訪當具豐歉狀入奏遂以實聞得免租例民歲輸軍衣布折錢三百官市價至千有二百時漕使檄所部令民折納如官市之值允不受曰使者怒不過逐令耳乃具報云民折納者給軍士官歲市者供朝廷可一其價耶事遂寢權知化州州濱海歲市玳瑁翠羽以萬計允悉罷之吳州鹽戶以蓄戎器坐盜獄成允辨其誣全活數十人後除新循二州皆不赴卒於家所著文存者二百餘篇子昉龍圖閣學士景舉賢良方正孫汶渭滋渙業儒皆繩繩繼美足稱世家

據張志粵大記修

張夔字致堯隆眼城都人

阮志隆眼城都舊屬海陽明成化割立饒平隸焉故周志稱夔饒平人

登

海陽縣志

卷三十五

列傳四

四

重和元年進士宰茂名卻豪戶賄黜贓贖吏諸司以清介薦第一高宗特賜璽獎諭題於屏曰南有張夔北有周昕尋擢判廉州廉產沈香生金官此者多囊括以歸夔一無所取又能化諭羣盜令投戈自散遷知新州首興學校捐俸刊五經頒民間子弟築隄瀦水灌田數千頃民稱張侯陂夔以五十登第七十致仕卒年九十

三所著有祿隱集子昌裔通判容州夔示以詩云慎勿與人交水

火好尊名節重邱山後改瓊州謹飭有父風

據粵大記周志參修

王大寶字元龜其先繇溫陵徙潮州政和閒貢辟雍建炎二年廷試第二授南雄州教授以祿不逮養移病歸八年差監登聞鼓院主管台州崇道觀乞祠家居趙鼎謫潮大寶日從講論語鼎歎曰

吾居此平時所薦無一至者君獨肯從吾游過人遠矣鼓院之役人讒君今觀文章學識孰與君君欲知讒者名否大寶曰不願也鼎愈賢之起知連州張浚亦謫居命其子栻與講學時趙張客貶斥無虛日人爲累息大寶獨泰然浚俸不時得大寶以經制錢給之浚曰如累君何大寶不爲變代還言連英循惠新恩六州居民纔數百非懋遷之地月輸免行錢宜蠲減高宗謂大臣曰守臣上殿令陳民事遂得知田里疾苦所陳五六得一可行其利亦不細矣乃命廣西諸司具減數聞改知袁州沈清臣以詆和議貶沅道出袁大寶留之旬日僚吏曰恐觸丞相怒笑不答表進所著詩書易解上謂執政曰大寶留意經術其書甚可采可與內除執政擬

海陽縣志

卷三十五

列傳四

五

國子司業上喜曰適合朕意時經筵闕官遂除國子司業兼崇政殿說書奏江南諸州有月椿錢無定名數吏緣爲姦刻剝民又有折帛錢方南渡兵興物價翔貴令下戶折納務以優之今市帛匹四千而令輸六千盍委監司覈月椿爲定制減折帛惠小民詔戶部詳奏直敷文閣知温州提點福建刑獄道臨漳有峻嶺曰蔡岡藪薄蔽翳山石犖确盜乘閒剽劫大寶以囊金三十萬募民抉藪翦道十餘里行者便之提點廣東刑獄初孝宗居潛大寶請聖斷擇可立者寵以王爵係中外望高宗嘉納孝宗卽位除禮部侍郎大寶言古致治之君先明國是而行之以果斷自軍興以來曰征曰和浮議靡定太上傳丕基於陛下四方日徯恢復國論未定眾

志未孚願陛下果斷則無不濟擢右諫議大夫首論朱倬沈該之
辜皆行其言汪澈督師荆襄大寶劾其不能節制疏再上澈謫台
州除侍講上曰太上皇知卿易學故有此除大寶嘗論及移蹕上
曰吾欲亟行大寶曰今日之勢殆未可願少寬歲月張浚復起爲
都督大寶力贊其議符離失律羣言洶洶大寶言危疑之際非果
斷持重何以息橫議未幾湯思退議罷都督府力請講和大寶奏
謂今國事莫大於恢復莫讐於金敵莫難於攻守莫審於用人宰
相以財計乏軍儲虛符離師潰名額不除意在覈軍籍減月給臣
恐不惟邊鄙之憂而患起蕭牆矣章三上求去除兵部侍郎起居
郎胡銓奏曰近王十朋王大寶相繼引去非國之福上曰十朋力

海陽縣志

卷三十五

列傳四

六

自引去朕留之不能得大寶論湯思退太早令爲兵部侍郎豈容
復聽其去未幾以敷文閣直學士提舉太平興國宮他日銓奏事
上復諭之曰大寶留之經筵亦固求去勢不兩立銓奏自古臺諫
論宰相多矣若謂勢不兩立則論宰相者皆當去尋請致仕督府
旣罷撤邊防棄四川金復犯邊詔思退都督軍馬辭不行上震怒
竄思退中外以大寶前言不用爲恨乾道元年起爲禮部尚書入
對言理財之道當務本抑末右正言程叔達奏大寶復免行錢非
是以舊職提舉太平興國宮中書舍人閻安中欲留其行叔達並
劾之詔大寶致仕尋卒年七十七所著有易經證義十卷經筵講
義二卷諫垣奏議六卷遺文十五卷及易詩書解行於世

據宋史
本傳張

志參
修

林昌期自祖父相傳累世同居兄弟無異產紹興閒郡上其事詔

旌其門

據粵大
記修

盧順之侗之孫事母孝好學篤行登紹熙四年進士調肇慶軍節

度推官僅書一考歎曰一日甘旨之奉猶勝十年仕宦之樂遂乞

歸十年不調母沒終喪三年卒年三十九終文林郎

據張
志修

張雷字穉春世居海陽大父昌裔倅容瓊二州父嗣宗有隱德雷

幼穎悟力學能文登嘉定七年進士第授廣州南海西尉未赴改

授藤州司理秩滿升從政郎辟象州簽判泣再考卒官

據張雷墓
誌銘修

謹案張雷各志選舉表皆不載其名據府志墓在大埔學宮

海陽縣志

卷三十五

列傳四

七

後康熙五十八年鄉民鋤地得石碑下嵌誌銘石二啟視惟

銅鏡一枚餘無所有謹摭錄誌文入傳以補舊志之闕

姚宏中字安道天資穎悟操守狷介少從鄉前輩遊卽志其遠者

大者及得濂洛諸大儒書讀之曰道在是矣登嘉定七年進士先

試禮部時劉燾同知貢舉得其文以爲根極理要擢第一及廷試

前期齋沐思有以敷露忠愫感悟上心考官以所對切直觸時忌

抑置第三旅寓都城一年自師友講學外無他交端居一室惟日

溫舊學補靜江教授未赴卒年二十九

據阮
志修

胡斌少以武階入仕爲殿前司將官從童德興提禁旅戍邵武江

閩寇作知邵武有備未敢犯會招捕司檄德興稟議獨留斌將弱

卒數百鎮城中紹定三年閏月己卯盜眾大至他將士皆遁獨斌奮身迎戰所格殺甚眾賊益生兵官軍所存僅數十人或告以眾寡不敵盍避之斌曰郡中死者以萬計賴生人數千由東門而出我不綴其勢使得脫走則賊躡其後無噍類矣遂巷戰大呼曰我死救百姓兵盡矢窮卒遇害其屍僵立移時始仆事聞贈武節大夫錄其後一人樞密院編修官王埜言邵武民卽斌戰地立廟請就以武節爲廟額從之

據宋史本傳修

馬發德祐中爲潮摧鋒寨正將二年驛報至潮元兵下臨安三宮北去元兵將壓境守令皆棄印走是年五月益王卽位於閩改元景炎十二月遣安撫使方興來潮慰諭發承命權州事稱安撫使

海陽縣志

卷三十五

列傳四

八

二年元兵至潮陽先驅諭降發與通判戚繼祖並降元尋復遁去十月元將索多攻潮州發嬰城固守卻之逾年海陽盜陳懿復導索多圍城塞塹填濠造雲梯鵝車日夜急攻發潛遣人焚之二十餘日不能下索多下令先登者拜爵已仕者增秩烏古孫澤曰潮人所以城守不下者以外多壁壘爲之援應也第翦其外應潮必覆矣乃分兵攻其一大壘破之餘壘盡走會南門巡檢黃虎子通陳懿爲內應元兵鼓譟突前總營兀良哈爾先登諸將繼之城遂陷發收殘卒百餘人入保子城度不可爲令妻子縊死發自鳩時

三月一日也

據宋史二王紀元史索多傳烏古孫澤傳粵大記阮志參修

陳植武經郎從叔祖玉簡勤王至厓山宋亡與張世傑斷維出以

六艦泊梅嶺港將求趙氏後時楊太后已崩元追師迫乃遁跡九侯巖卒葬其地遺命望厓山葬不北嚮

據張志修

元

陳肅字文端宋寶謨閣待制恪之子宋末避亂鮑江教授蓮花山下講明正學文天祥過潮召見與語奇之檄爲參謀不就至元初以賢良應聘賜第舉署總管府事修文廟及濟川橋多惠政累官朝列大夫宣慰同知總撫湖廣常德路有奇勳遷樞密同知卒所著有蓮峯集孫元龍字仲章以經明行修授福建廉訪使政聲洋溢以疾歸隱龜山闡明濂洛之道戴希文嘗從學焉曾孫善字克一幼失恃事父謹父有疾顛天請代及居喪尤有禮鄉里稱焉

據阮

海陽縣志

卷三十五

列傳四

九

志張志
參修

謹案戴志云肅以元初舉賢良授總管府事越二十一年應聘賜第授朝列大夫任湖廣常德同知孫元龍作元隆

戴希文名昌以字行博通經史不樂仕進自號野民敦行誼鄉人宗之至正閒潮寇搶攘學校廢弛總管王翰遷韓山書院於大隱庵延希文主教事著有航錄行世崇祀鄉賢

據阮志韓山書院碑參修

張奐號魯庵明易學終日危坐衣冠儼然郡縣累辟不出冠婚喪祭一遵文公家禮鄉人化之元末盜起過其里曰此張先生居也

戒勿犯卒葬蓮花峯

據阮志周志參修

陳德安賦性嚴毅元末亂結廬鰲頭鄉耕讀避世有賊榮永者聚

黨數千人肆行剽劫聞安女有色將擄之安聞警令老蒼頭負幼子以逃乃積薪舉火偕妻許氏女大娘同焚死女畫壁詩有百年塵事渾如夢留與丹心照汗青之句聞者哀之

據府志修

李關字子羽早孤事母孝性敏好學通春秋諸子史皆識其大略至正間元兵逼城關負母避難外族從姪曾氏家尋隱居不仕教授郡邑貧者輒與之書籍鄉人爭者願聞於官恥聞於關尤精醫術人賴以全活者甚眾學者稱爲北源先生

據周志凌迪知萬姓統譜參修

海陽縣志

卷三十五

列傳四

十